

Francisca Hendry-Berther, Sedrun

17-3-92



Ins ha detg ad ella semplamein la Zisca dil Luis – ed il Luis ha tenui ault sia Zisca. Ella ei la davosa descendenta dil Placi Mattias Berther e dalla Leonora, ina nata Cavegn – da quella famiglia renomada da hoteliers.

Francisca Hendry-Berther ei nashida cuort avon Nadal digl onn 1902; ils 21 da schaner 1992 eis ella spartida. Navonta onns ei in spazi – ed avon onns han ins detg che tgi che tegni en honor bab e mumma vegni vegls.

La Zisca ei carschida si el ravugl d'ina pensiu e dasperas in stallaz da cavals. La casa d'albiert ha tenui petg als Franzos ch'ei ruts ella tiara e siu bien num ei semantenus ed ils fargliuns Lucas, Tina, Christian Berther e sia fa-

miglia han rabitschau ad ault il hotel dalla Cruna a Sedrun.

Sco igl ei stau da lezzas uras; suenter las scolas dil vitg ei la Zisca ida naven e sut ed ha empriu vitier, il lungatg dil paun ed ulteriuras caussas. Per silsuenter turnar e per semetter a per cun ses fargliuns el menaschi dalla hotellaria, damai ch'il bab veva stuiu murir in onn avon l'emprema uiara.

Cun ina allegria ed in humor serenein ha ella, la Zisca, dumignau sias damauns. Ed ella ei stada beinvesida – e mats vess ei per cass dau tut put. Entochen ch'il Luis Hendry ei vegnius ed ha dumandau la Zisca pil maun; ella ei seschada en cul Luis, malgrad ch'il pot da Rueras vevi giu detg ch'ella vessi giu auras letgas che ir cun «ina butgèda» smaccacrapa.

Ton che la giuvna consorta ei dada dadens la Cruna si, si per la sulada encunter Pitgmun. La scuvretga dil quartier ei stada ina esperienza, la sentupada cun quella glied singulara en amiez la truscha e la breigia dil di. Bein tut enzatgei auter che da star mo casualmein en fatscha duront la sera sontga. E la Zisca ei dapi adina stada discurreivla e damai ch'ella ei stada discurreivla ei la glied dalla scheina seschada en cun ella, quellas persunas stimolontas, sco per semeglia: La Dica Placia, ils Madleiners, ils Carliners ed ils Sepers epi ils Tgavrès cun vuschs grossas e gitas, mo tuttas fetg humanas. Ed il profit dils discuors ha la Zisca mess dad ina vart, dapi 1929 ch'ella ei dada enviars il Pitgmun. – Tgi ha tenui adaquen la legria ch'ils consorts han giu dad ir a star ella casa nova osum il Drun (1934), quei liug cun ina vesta enviars il Culmatsch entochen il Cavradi e vesend a bunura a sespundend il sulegl giu per las costas e giu per las palas. Neu dils uauls ha il Luis rabitschau plontas e plantau giusut e dator casa ed en ton sco nuot ein

ils utschals secasai ella roma. Fertion che la Zisca ei s'empitschada dallas flurs, flurs e flurs sut mintga grunda. E cun las flurs ha ella priu tut en pasch, era las insufficienzas dil dumpergi. Sias flurs ein stadas fideivlas e vegnan buca a snegar la Zisca dil di dalla gronda levada.

Pongir – la sort ha manegiau bein cun el e cun ella. Schebi ch'ina famiglia da tschun affons ei dabia e zanua s'ei dau stedi alarm. Da mirar encunter vesen ins detg che la Zisca hagi dumignau pulit – ils dis malguess era. In di ein els stai persuls, ils consorts; in suenter l'auter dils affons ei ius a secavigliar ordeifer e la feglia Letizia ei daventada ina religiosa e dalla claustra anora han las caussas tuttas ina dimensiun differenta.

Cun bi e bein tschunconta onns ei il Luis vegnius malsaus e sia malsogna ha spossau fetg. La Zisca sezza ha detg plitost pauc; ella ei seremessa – ed ida a rusari.

Ualti exact avon diesch onns ei il Luis morts; l'existenza dalla Zisca ei stada blessada. Meinsvart eis ella ida cun pass pesonts on zuler ed on talina e la Zisca vess bugen detg al Luis ch'ella hagi pinau il gentar.

E suenter gnanc ton ditg buc ei la Francisca Hendry-Berther ida ella casa da sogn Vigeli. Bunamein enina eis ella vegnida da pauc plaid; ella veva sco calau da tedlar e da spanegiar ils egl. Perencunter eis ella seviulta enviars ils frusts d'anen, quels che tonschan pli lunsch.

La frestgezia dalla Zisca cun ses pass manedels vegnan a muncar el quartier da Pitgmun, sisum il vitg da Sedrun.

Ad ella da cor las pradas dil matg etern ed als ses la fermezia da purtar resignadamein la sperdita d'ina buna mumma.

Vic Hendry

Franziska Hendry-Berther, Sedrun



Per l'emprescha gada egl onn 1992 tucca il zenn da miert a s.Vigeli. El annunzia la mort da nossa convischina Franziska Hendry-Berther da Sedrun en casa da vegls s.Vigeli.

Franziska ei naschida ils 21 da december 1902 a Sedrun, sco feglia da Placi Mattias Berther ed Eleonora Cavegn. El vitg nativ ha ella passentau ina biala affonza el ravugl d'ina gronda famiglia. A Sedrun ha ella frequentau la scola elementara e silsuenter visitau la scola egl institut s.Giusep a Glion. Suenter quella scolaziun ha ei tuccau da serender ella Bassa en piazza. Returnada en la patria ha ella luvrau biars onns el Hotel dalla Cruna.

Igl onn 1929 ha Franziska menau il giuven Luis Hendry da Gionda agl altar da nozzas. Dieus benedescha la ventireivla letg cun tschun affons che portan bia sulegl e legria, denton era bia lavur e quitau. Igl onn 1982 piarda ella il carezau mariu. Ina greva crusch per la Franziska.

Avon otg onna sto ella serender ella casa da vegls s.Vigeli. Leu ha ella astgau guder la buna tgira dallas soras e dil persunal. Franziska Hendry-Berther ei stada ina femna semplia e ruasseivla, cun in saun humor, da cumpignia, in carstgaun cun ina ferma cardientscha e profunda pietad. Ella ei morta en l'aula vegliadetgna da prest 90 onns, ils 21 da schaner 1992. Ella ruaussi en pasch.